

Pa festival di buki y pelicula:

ESCRITOR ARUBIANO DENIS HENRIQUEZ LO BISHITA NOS ISLA

ORANJESTAD(AAN): -- Manera DIARIO a trece pa dilanti algun dia pasa, Instituto di Cultura hunto cu e stichting N.A.N.A. (Nederlandse Antillen, Nederland en Aruba), ta organisa e 'Festival di Buki y Pelicula Hulandes'.

Esaki lo dura di diabierna 17 di mei te diadomingo 26 di mei, den Cas di Cultura.

Den cuadro di e festival, cuatro escritor lo bishita schoolnan secundario.

Nan ta Denis Henriquez, Frank Martinus Arion, Joost Zwagerman y Tessa de Loo.

Denis Henriquez ta un Arubiano biba na Hulanda, conoci di su bukinan 'Zuidstraat' y 'Delft Blues'.

Cu Zuidstraat, Henriquez-kende ta docente di natuurkunde na Rotterdam- a debuta na aña 1992.

Su prome buki ta trata di e bisiñanan den un caya na Playa, kendenan ta conta otro di nan amornan, nan desapuntacionnan y nan sentimentonan di soledad.

Na 1995, el a skirbi Delft Blues.

Esaki ta tocante un estudiante

Arubiano cu ta bay Hulanda pa studia, y ta logra pa adapta su mes, despues di algun dificultad.

E buki ta describi e bida di estudiante den añanan sesenta, na un manera humoristico y for di perspectiva di un persona cu no a pasa den guerra, manera otronan di su edad.

Frank Martinus Arion ta un escritor bon conoci, cu mayoria di hende lo tabata tin riba nan 'boekenlijst'.

E ta yiu di Curacao, y ta biba tambe, na nos hermana isla.

Su prome roman tabata 'Dubbelspel', skirbi na 1973, sigui pa 'Afscheid van de Koningin' (1975) y 'Nobele Wilden' (1979).

Su ultimo buki ta 'De Laatste Vrijheid'.

E personahe di mas importante den De Laatste Vri-

jheid, ta e Antiyano Daryll Guenepou.

Despues cu el a hera caba na nada door di droga y otro problemanan, Daryll Guenepou ta corda e isla Caribense Amber, unda el a yega di pasa un vakantie cu su casa.

E ta bay e isla aki y ta logra pa yega na un existencia satisfactorio, biba na pia di un volcan.

E escritornan Joost Zwagerman y Tessa de Loo mientrastanto, lo tene charlanan den Biblioteca Nacional di Playa, banda cu nan ta pasa na e schoolnan.

Esaki riba diamars 21 di mei y diahuebs 23 di mei.

Ta importante pa menciona finalmente, cu Biblioteca Nacional a haya e bukinan di e cuatro escritornan regalo, pues por ofrece nan na esnan cu ta interesa pa lesa nan.